

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 14, No. 575

原始資料: 蕭鎮國大德提供, 維習安大德提供之高麗藏 CD 經文, 閩學新大德輸入 / Gamblers 大德初校 / 沈介磐大德二校, 北美某大德提供

No. 575 [Nos. 576, 577]

佛說大方等修多羅王經

後魏天竺三藏菩提流支譯

如是我聞。一時婆伽婆。在王舍城迦蘭陀竹園。與大比丘僧千二百五十人俱。及大菩薩摩訶薩眾。爾時摩伽陀國頻婆娑羅王。出王舍城。詣迦蘭陀竹園精舍。至世尊所。頭面禮足。遶佛三匝。退坐一面。

爾時世尊即告頻婆娑羅王言。大王。如人夢中見於眾人。與諸婬女共相娛樂。此人覺已。憶念夢中眾人婬女。大王。於意云何。如是夢中眾人婬女。為有實不。頻婆娑羅王答言。不也世尊。佛告大王。於意云何。是人夢中見婬女。與諸人等共相娛樂。覺已憶念。如是之人寧有智不。大王答言。不也世尊。何以故。世尊。夢中畢竟。無有眾人及眾婬女。眾人婬女尚不可得。何況當有共相娛樂。佛告大王。凡夫之人亦復如是。眼見美色便生愛著。既生愛著便起欲心。既起欲心起瞋癡業。或作身業。或作口業或作意業。彼所作業作已而滅。滅已不依東方而住。亦復不依南方而住。亦復不依西方而住。亦復不依北方而住。四維上下亦復如是。至臨終時行識將滅。其意現前。大王。如是行識。自作之業必盡受之。大王。如人夢覺。不見婬女及諸人眾。行識滅已初識次生。或生天中。或生人中。或生地獄。或生畜生。或生餓鬼。大王。以初識不斷自心相續。應受報處而生其中。大王。觀諸生滅頗有一法。從於今世至未來世。大王。如是行識終時。名之為滅。初識起時。名之為生。大王。行識滅時。去無所至。初識生時。無所從來。何以故。識性離故。大王。行識行識空。滅時滅業空。初識初識空。生時生業空。觀諸業果亦不失壞。大王當知。以初識心相續不斷而受果報。爾時善逝。說此語已。而說頌曰。

一切唯名字	唯住想分別
名字分別說	而說無所有
以種種名字	說於種種法
法中無如是	此法諸法相
名字名字空	名字離名字
諸法無名字	以名字而說
此法非實有	以分別而生
彼分別亦無	空以分別說

一切凡夫說	眼能見於色
世間妄分別	取之以為實
佛之所說法	眾緣集故見
此是行次第	為說第一義
非眼見於色	意不覺諸法
此是第一諦	非世間所覺

爾時世尊說此經已。摩伽陀國頻婆娑羅王。一切世間天人阿修羅捷闍婆等。聞佛所說。皆大歡喜。

佛說大方等修多羅王經